

四庫全書

集部

欽定四庫全書

雙溪類稿卷七

宋 王炎 撰

古律詩

送謝庭玉二首

舊事十年久故人千里踈
喜逢青眼語勝寄錦鱗書
草草銜杯酒忽忽返筓輿
桂山今健否煩為問興居

二

話舊情非淺過歸意謂何
杜門元簡出命駕特相過
黃

鵠仙翁逝青衿子姓多屬渠勤肄業歲月易蹉跎

送劉都幹

本歎儒冠誤因思學六韜侵尋身尚困凌厲氣當豪生
理舊良薄親年今已高匣中雄劍在早去樹旗旄

清江勸駕送舉人二首

此以上臨江所作

藏山有良玉潛淵有明珠寶氣露光彩見者詎肯遺賢
士抱良貴又與珠玉殊方其未達時眇然一布韋時來
取通顯乘軒而執珪鶴書出閭闔聖清明初彈冠今

景征駸駸上天衢顯親與事君忠孝當無虧

二

黃堂暫虛位勸駕屬守丞金石方過密不敢歌鹿鳴吉
蠲置觴豆少洽賓主情西風吹桂枝馬首將東行春官
奏高第天子開延英親策降清問健論攄丹誠解褐躋
膺仕何止為身榮二劉與三孔至今流芳馨願言踵前
脩勉矣垂令名

次韻分寧胡宰贈行

別駕無才堪展驥解印來歸私自喜意欲息肩猶未能
政坐文窮巧為崇臆仙傾蓋如舊知冰玉清言心可洗
況逢父老誇長官撫字有恩淪骨髓做裝暫去桃李陰
遽勤飲餞枉車騎自憐孤冷仍數竒諸公薦口頗難啓
溪上只今梅未花歸時春燕定成壘妙語吹噓恐過情
甚慚綠綺奏山水君才過我蓋十倍乃容蹇足陪驪駉
異鄉為客更別離寒日纔黃催短晷平生惜飲亦徑醉
放歌不記南山鯉

次韻巴陵羅簿送行二首

旌陽峯下水成淵可約鳧鷖共一川
種秫漸營浮蟻甕結茅重理蠹魚編
敢期晤語方傾蓋遽有新詩當贈鞭
仰望青雲多鼎貴無由換骨學飛仙

削去浮夸意味真襟期殊不似今人
慶傳於後珠成樹德潤其身玉有筠
在昔雁行嘗並進只今雀髮獨相親
仕雖不達俱強健剝復何須問大鈞

次韻分寧羅簿贈行二首

剛腸厭徇俗老眼飽閱世讀書學經綸亦頗識一二妄
意糟粕中啜齏得馨旨終然不可用落落多左計慨念
古人遠莫救吾道弊脩溪有短簿今代習鑿齒貽我瓊
瑤章有美而無刺內視才具短不能尺有咫贈言雖甚
寵借玉恐未是公等必飛揚我老惟退避

二

己丑太常第君家登兩翁黃鵠久仙去不亡有流風小
阮最逸羣未幾魚化龍江城始解后岩邑仍過從謂予

借二父聯名千佛中一見辭色莊再款肺腑通議論到
易象或借聽於聾我行踏京塵君棲簿書叢情親不厭
久語別殊忽忽回首川陸隔天寒悲塞鴻

郊祀慶成詩

此以下中都所作

燕翼傳丕緒龍飛襲慶基萬年新景命三歲始親祠脩
已崇仁儉承顏洽孝慈和平調玉燭靜謐偃鋒旗九廟
歆禋享三宮集壽祺馨香端可薦降鑿本無私寶律迎
長至觚壇歲上儀貢金來牧伯執玉列丞疑裸鬯清宮

後燭蕭太室時青城收宿靄黃道煥晴曦六驥鑿興穩
千牛彩仗移聲文蒐舊典誓戒儆前期陟配尊皇祖靈
承合大示陶匏浮泛齊繭粟用駢犧皦繹園鍾奏忱恂
祝冊辭夜分風籟靜天近斗杓垂聖意彌寅畏臣心盡
肅祇欽柴靈下墜拜昨福來綏樂與民同慶寧頤已受
釐榮光浮翠輦歡抃擁彤墀日騎屯方罷雲韶樂共隨
一聲傳入蹕萬目望華芝丹鳳端門聳金雞渙號施厖
恩沾動植協氣暢華夷星拱班徐退天容喜可知乾符

宜永握瑞謀遂停披嵩嶽聲洋溢鈎鈐色陸離永承長
樂養恭奉未央卮錫羨均家國儲祥衍本支函生蒙帝
力擊壤共春熙

送吳司令知金州

曩時異姓新安王中興功烈書旗常邊兵不敢窺蜀塞
至今恃此為金湯我生久恨在王後幸識王孫人物秀
立朝日淺即西還自詭一州宜試守媯墟北望臨咸陽
往事令人多感傷清時乘障姑緩帶試問澆瓜兼採桑

湖上花光濃似酒，紫微惜別同攜手。一杯為壽謝不能，
千里關山漫回首。春秋鼎盛握虎符，此行善保千金軀。
籌邊熟慮得全策，歸來却獻平戎書。

和李提幹携詩相訪

古來論人物，西蜀名士多。李侯有醞藉，自愛如隨和。
不肯扣朱門，漫刺獨我過。筆端金石鳴，音節如九歌。
小拂榻上塵，揮塵傾懸河。歲月易晚晚，功名忌蹉跎。
西風向搖落，如此羈旅何。倦游且西還，萬里行江沱。
士誠有所

挾光彩終不磨翰墨更著鞭淵雲可同科

用前韻答李提幹

交游不厭廣益友未必多晚乃識斯人心肅而氣和薄
言臭味同屢枉高軒過手携綠綺琴絃以白雪歌別易
會合難預愁隔關河老我無所營豈復憂蹉跎才高位
猶下君意將如何有玉不願獻誰能涕滂沱自可薦藻
藉政須工琢磨何以贈君行聖門晞四科

九日登寶叔塔同游者楊大著李校書馮正字

曾著作易校書

湖邊老石立巨鰲背負浮圖千尺高升高望遠天界濶
海山江樹皆秋毫蓬萊藏室極清靜雖有暇日無遊遨
不應令節亦虛度特為萸菊觴新醪樽前一笑豈易得
身涉百憂今二毛茲游回首便陳迹事如逝水流滔滔
明年九日定何許未用感慨增煩勞半生隨牒落州縣
莫年結綬來神臯去留聚散偶然耳且覆一杯持蟹螯

用元韻答楊大著李校書

蓬萊雲氣依海鰲中有詩仙流品高子雲抄書自點勘
方瞳炯炯分纖毫仲元公退便燕坐日涉藝圃當遊遨
烏衣裔孫不解此但摘青蘂斟官醪壯年落筆無好語
況復衰颯垂霜毛二豪拔足立塵表下視流俗徒滔滔
詞鋒健鬪取一快往復險韻不憚勞旁觀微之敵白傅
自分司馬優枚臯倡而不和當受罰丐公酌酒羞二螯

送王巽澤侍郎

今代王文度聲名滿日邊中年登近侍早歲悟深禪要

路頻回首名藩小息肩卷舒無不可胸次本超然

二

屈指桃溪上差池二十年知心寧易得識面豈無緣
離別何須恨平安可數傳異時如索我小隱翠微邊

張尚書挽詩

魏國扶天力荊州貫日忠堂堂惟此老凜凜尚英風
地寄陪京重名加秘殿隆望徒高四海身不到三公

二

細數青雲士如公有幾人登龍心不遂烹鯉字猶新後
進思高誼中朝念信臣百年喬木折有識共酸辛

李少保挽詩

潔已惟清德櫻鱗有格言位雖居鼎鼐心已在丘園身
退名增重年高道愈尊哀榮無可憾餘慶子孫蕃

二

昭代多諸老惟公有典刑上方思舊弼天亦畀脩齡竟
委元成笏俄傳有道銘只期麟閣上遺像拜丹青

太皇太后挽詩

弧矢能天授詩書德日新中興扶漢祚內禪贊堯仁鏤
玉三朝慶塗椒四世親乘雲今不返垂白泣遺民

二

離日升黃道簾中出玉音位高踰薄竇德盛掩姜任七
紀哀榮備三宮愛慕深補天生萬物何以答仁心

從范秘監過城南陳亦顏讀書樓

客來揮麈對觥船客去焚香閱簡編車馬軟紅塵裏走

不知委巷有壺天

軒冕浮夸不繫情
山林清奧可逃名
如何結屋依廬阜
又却移家近玉京

次韻楊秘監館中即事

簾箔風清乳燕飛
綠陰遶殿覆銅池
九衢達官爭馳轂
羣玉詩翁獨下帷
鳳餅正當分賜後
牙籤又近曝書時
管城寫出琳琅句
付與神靈為護持

次韻午睡不知雨作

曲肱幽夢午風涼銷盡熏爐一穗香急雨蕭蕭猶未覺
浮塵熠熠更相忘自非靜處心神定誰識閒中氣味長
隱兒豈容無一事願將竒字問偏傍

次韻楊秘監館中留題

把杯方喜挹流霞照眼驪珠重拜嘉庭下滿生書帶草
胸中宜吐筆頭花敢言策足攀賢躅獨幸游心泳聖涯
誰謂蓬萊雲氣遠此中清閤即仙家

又題

紅塵飛不到壺天風月幽懷屬老仙自笑枯腸無好語
且呼黃妳曲肱眠

九日陪楊秘監游真珠園屬炎賦詩

珍重蓬萊老携壺領客來湖山羅畫笥風物獻詩材素
髮難重染黃花有再開莫憂身外事且覆掌中杯

送黃尚書帥蜀

六蜚駐蹕臨東吳益州遠在西南隅君王右顧入念慮
選用名德分麟符文章政事俱第一袖手未肯持鈞樞

清獻之清過於水忠定之信孚豚魚二賢寂寂未有繼
蜀人惟恐公來遲沂江萬里飛鷁首祝公善保千金軀
髮須未見一絲白歸來便可居丞疑清時緩帶鎮方面
問民疾苦勤褰帷頗聞今蜀與昔異昔日民肥今已懼
願言細意護根本要令可與同安危更須推轂拔人物
勿念折筭咎羌夷想見明年初下車錦官城裏花正都
四郊按堵但耕鑿春風蕩漾隨旄麾遨頭一笑父老賀
九重不用憂坤維

題徐商叟叅議儒榮閣

神臯北望幾傷情，海上何人議北盟。
青簡成編裨史事，紫泥封璽獎儒榮。
書藏金匱人爭問，身到蓬山志亦亨。
佩印累累真漫耳，婆娑林下有香名。

銛老許相過，不至炎約堯章訪之。又以事奪銛
寄二詩次其韻

聞道幽棲好，天香坐上飄。
熟知甘淡泊，甚欲識孤高。
縱有門關隔，元非道路遙。
恐公真簡出，不過虎溪橋。

二

南山藏霧豹幾欲訪幽深詩到如相挽盟寒尚可尋
惠初從柳子支遁會山陰此事今寥落期公慰我心

游劉寺次林子長郎中韻

琳瑯觸目聚潛郎假日相携入酒鄉小凭筇輿穿野徑
却尋蕭寺涉脩廊意行塵外襟懷爽身坐梅邊笑語香
頭白倦游休嘆息喜迎一線日華長

炎十世先隴在婺源不歸拜掃者九年清明有

感遂成小詩

九陌黃塵裏不知桃李開
忽忽春又過
逐逐老相催
浮脆身如露
紛華念已灰
松楸無恙否
久客盍歸來

同李魯二郎中游三茅觀

羽衣邀我坐團蒲
一穗香雲遶竹爐
九陌紅塵飛不到
疑從木末入懸壺

愁邊無處寄幽懷
擬傍梅花把一杯
玉靨含香渾未吐
嘗携歡伯為重來

路入疎梅密竹間俯看水墨畫湖山玉妃妬我清游好
剪水飛花作苦寒

用元韻答李郎中

未問仙家九節蒲且持茗盃對熏爐黃冠也肯迎留客
咀嚼梅花費一壺

冰玉談清洗老懷興濃亦覆手中杯平生蠟屐登山慣
豈必因花特地來

地近觚稜雲氣間藥珠宮殿壓青山雲根盡處天風急

疑是人間有廣寒

用元韻答鈿老

人間得喪等樗蒲
何似緇經擁地爐
尚學湯休頻覓句
儻逢元亮一傾壺

舐犢酸辛入客懷
何堪婪尾更傳杯
却思拈拂談名理
肯憚携筇數往來

墮在黃塵九陌間
羨君小隱住南山
梅花香裏尋支徑
屢有盟言不可寒

臘中得雪快晴成古風呈堯章鈞老

蒼頭熟睡喚不應
光射紙窻疑月明
更籌可數夜方半
杙上一雞先誤鳴
曉起飛花堆戶外
幻出人間無色界
九街車馬不知寒
蹴蹋銀杯翻縞帶
杲杲日升東海東
須臾光彩蒸霞紅
不憂桂玉頓增價
人在沖融和氣中
貝闕珠宮五雲際
遙知天上龍顏喜
麥畦白白覆青青
農事來年定豐美

用元韻答李郎中

何人喚得滕六應遣我通宵銀海明起來無以助清興
銅瓶煮茗松風鳴恍疑拔脚塵寰外玉田萬頃無疆界
蒼官青士亦改容高下瑤林相映帶騎鯨人在日華東
曉踏天街無軟紅雪車冰柱堪著語何止爭雄郊島中
翩翩霍鬣凌風際得句搖毫心自喜從渠春笋捧金荷
醉倒瓊瑜貪睡美

游水樂洞

戊午

路向峯腰轉泉從洞口來決渠飛瀑布伐石作崔嵬勝

境難頻到幽懷只暫開
登臨興不盡日昃故須回

出城

郊原雨過草萋萋
桑柘陰濃麥穗低
春色難留人易老
落花風裏杜鵑啼

即事四首

游宦初心改
殷憂素髮稀
稍閒甘晝寢
已暖怯春衣
遮眼惟黃卷
關心在翠微
去留俱有恨
不見二雛飛

二

髮禿憐毛穎纔供米帛謀才疎無可用身老更何求
燕語催春事花飛惱客愁行藏猶首鼠歸夢遠滄洲

三

半日肩輿走歸來已滿然倦談懸麈尾清坐炷龍涎
有累緣糊口何時可息肩靈襟要淘洗盥手閱韋編

四

京國三年夢家山二子喪淚乾昏老眼痛極斷中腸
數盡誰無死情鍾自不忘餘生寧有幾回首意茫茫

汪秘校携詩併雪月二賦相訪次其韻

自從就食寄他州不到鄉關近十秋
文采誰能如象齒交游今乃見
龍頭携詩過我情何厚落筆驚人語不休
雪月賦成凌二謝高懷肯迷畔牢愁

送朱大卿歸龍舒

觚稜挂曉日浮鷁違都城今代朱伯厚
勇去投簪纓津津眉睫間不見離別情
問之何能爾內重外物輕聲利誘
一世漏盡猶夜行豈不厭逐逐無由息
營營若人著

眼高不受世網撻奮身許國久艱險亦飽更乘傳上蠶
叢擁旄到龍廷中朝豹尾班詎可欠老成一旦念丘園
拂衣即遐征君相雖貪賢欲留終不能班以內閣與秩
之間館清皖山挿天翠淮水到海平婆娑山水間可築
半隱亭雞豚入新社鷗鷺尋舊盟收身謝危機至此全
脩名嗟我為糊口偃蹇侵頽齡仰羨冥鴻高俯慙曉猿
驚青山不負約行矣謀歸耕

題徐商叟所藏李伯時四天王圖

龍眠有巧手幻出汗血駒老衲或戒之回向心地初遂
畫白衣仙蘄與梵釋俱北方四天王亦附瞿曇居雜以
馬龍像宿習終未除四王名字異且復形狀殊信者謂
其有疑者意其無蕩蕩天門高誰能凌空虛何以信不
疑取諸貝葉書子不語怪神從釋恐畔儒語之且不可
筆之其可乎因畫議及此於公意何如

次韻胡連翁携詩見訪

蘄春別駕寡交游獨肯對君青兩眸我亦杜門嫌俗子

今方下榻得詩流環溪陳迹幾如掃鄂渚遺文散不收
訪舊九京無起日臨風三嘆不能休

太上皇后挽詩

紫殿尊嚴地黃圖揖遜辰一言裨大策萬物賴深仁配
極乾坤大重輪日月新遽違天下養氛祲揜鈎陳

二

大帝資陰德吾皇仰母慈盛儀猶漸服新樂在含飴玉
冊將增慶椒庭遽共悲憂勤終損壽天道果難知

太上皇帝挽詩

揖遜承虞治謳歌與啓賢御圖纔五載垂統可千年明
有重離繼高居太極先四朝三內禪盛美古無傳

二

億兆方同慶三宮洽孝慈坤輿俄弛衛天極遂纏悲共
憾遺丹鼎無由奉玉卮光輝終不熄徽號日星垂

題姜堯章舊游詩卷

出郭栽花涉小園歸調琴譜輯詩編少年豪健今孱斂

休羨騎鯨李謫仙

和九日堯章送菊

對花懶舉玉東西
孤負金錢滿綠枝
短髮不堪重落帽
枯腸何可強搜詩

花品若將人品較
此花風味似吾儒
秋英飡罷含清思
曾有離騷續筆無

送陳華文出守當塗同僚餞別分韻得立字

今代陳仲弓人門
兩難及長離五色羽
覽輝早翔集功

名雖鼎來未肯心汲汲自請牧一州小民要安輯維時
春將半桃李露華濕慈顏御輕軒綵服隨坐立行行即
下車嘯諾解苛急凝香宴賓從仁氣散臯隰政恐席未
暖追鋒已催入塗轍可通行青雲如陟級

即事

時寓清化

久輟囊中句時看肘後方有家如旅舍無事似僧房梅
白墻頭笑榴紅甕面香杖藜如可出溪上探春光

庚申元日

九陌歡聲合三宮瑞氣開陰雲催歲換霽日迓春回鬱
壘還當戶屠蘇強舉杯二雛無返日羸老不勝哀

和楊郎中北廊梅花

不臨水曲與山隈却在天臺獨自開幽韻可居蘭友上
孤標惟許竹君陪廣寒仙子雲中下姑射神人海上來
冰玉皎然清徹骨南廊亦欲斲根栽

和陳右司春雪

換却人間色界塵千林別作一家春風娘寒重吹飛絮

月姊光凝映爛銀曳履獨游無此士閉門高臥有何人
試從羣玉山頭看似與瑤臺貝闕鄰

送楊明夫郎中持節闕中

稍覺飛騰疾方知選擇公雲霄移列宿泉嶺度春風問
俗窮閭底搜材薦墨中褰帷先辨此續續寄詩筒

壬戌立春日寓清化

晚晚流年度淒涼短景催月圓疑臘半歲閏已春回一
箸青絲菜三杯白玉醅主人無喜事蠟炬誤花開

賀吳興郡王生日

壬戌

花萼樓臺畔年年瑞氣新
慈闈歡愛洽帝殿寵光頻
清靜心如水平氣似春
自然眉壽永何必羨松椿

登四望亭

饒州甲子

春老飛花盡園林遍綠陰
憑高聊寓目念遠更傷心
劇郡才難稱衰年病易侵
不如休歇去吾意決投簪

閒居即事

自饒州回武口

稍稍開三徑徐徐辨一塵
歸來非失計老去只隨緣
旋

蠟登山屐時操泛月船生涯且如此蕭散樂餘年

二

壯年多旅寓晚歲遽鰥居傷往遂成賦解嘲休著書經營惟種蒔來往但樵漁百念今灰冷雖貧自晏如

三

四面青山合中藏小隱家謀裁陶令秫學種邵侯瓜筍長多添竹荷高漸有花林泉宜寂靜鼓吹厭鳴蛙

喜晴

欲了老妻窀穸事屈指前期日無幾羊腸路險不容車
水澀石高灘齒齒天公憫我憂惱深一雨驟添三尺水
黃流又恐舟難行落盡雪花天宇清六龍扶輶日杲杲
更乞天公旬日晴襄事歸來閉門坐但擁竹爐多熾火

用元韻答秀叔

休將世事關身事自數頽齡尚餘幾那堪老賦悼亡詩
不見蛾眉瓠犀齒熏染可無知見香澡雪正須功德水
風波跌足今憚行林下獨居心迹清冷看世態有翻覆

蚌則欲雨鷓欲晴何似消搖常燕坐雪白蓮花生烈火

用元韻答秀叔二首

人生昏宦只二事憂喜相纏不知幾我今豈可老更癡
頰有霜髭口無齒舉案齊眉安在哉獨自飯蔬而飲水
半生同住不同行稍感傷悲心亦清雉鳴雌應春日暖
鳩喚婦歸天雨晴斷除此念如尸坐調護坎離交水火
老身强健幸無事舊日交游存者幾後來阿秀詩句新
露滴金莖寒著齒笑我胸中千斛塵解纓未濯滄浪水

翠微嘗約載酒行洗耳潺湲泉石清天寒短策未可出
更約東郊春日晴且來伴我窻間坐黃妳在旁同附火
秀叔和章自言及再娶之事用元韻戲荅之

寤寐閒思疇昔事來往于懷日凡幾伯鸞不可無孟光
豈為青眉并玉齒阿咸今與我不同蛩蛩得草魚得水
流蘇帳暖雙杯行春近梅粧香更清試唱劉郎竹枝曲
道是無晴還有晴長夜老夫方獨坐手把楞伽對燈火

池邊梅花一株盛開

天外青鸞不復歸
蕭蕭短髮日成絲
寒梅不管人憔悴
故著新花滿舊枝

老來裘褐怯風吹
難傍花邊把一卮
嚼藥嗅香清興在
尚呵凍筆欲題詩

戲江子大

莫年尚戀蛾眉斧
平日空談蠟腳禪
應笑老夫甘寂寞
只將黃妳替嬋娟

用元韻答子大

桃花映面方留咏
藤刺纏身始悟禪
短髮鏡中霜薄薄
脩眉窻下月娟娟

追悼親哥

昔在清華日明珠
掌上新豈期吾薄福
不見汝成人荒塚
魂長夜空山草
自春淒涼無限恨
獨坐一沾巾

送石宰

溪頭雪後梅花發
飛鳧東去朝雙闕
涉溪父老肩相摩
再拜路旁皆惜別
問侯何以能得民
胸中仁氣如陽春

攀轅徒切候不住金馬石渠須若人雲溪野叟久閉戶
時枉高軒肯相顧何不臨分把一杯天寒懶出無他故
別離羞作兒女悲此行穩上青雲衢相思要得知健否
寄我平安雙鯉魚

念舊

香銷篋裏舊裳衣回首人間萬事非天濶海寬魂杳杳
雲軒何日復來歸

老懷易感淚汎瀾塵世分明一夢間精爽乘鸞雲外去


空留玉骨葬青山

久雨無聊成兩詩呈秀叔并簡繼韓

花落雨不止鶯啼春又徂
曲肱眠短榻擁雪坐團蒲
梅子今堪摘松醪不待酤
兩君能坐隱泥濘肯來無

二

避濕屋多漏怯寒窻不開
龍涎時吐霧麈尾任生埃
獨與韋編對誰能蠟屐來
天知蠶蟲麥病願喚雨師回



雙溪類稿卷七

欽定四庫全書

集部

雙溪類稿卷八

十五

詳校官庶吉士臣吳烜

主事臣呂雲棟覆勘

總校官進士臣朱銓

校對官學正臣翁樹棠

騰錄監生臣任銜萱

欽定四庫全書

雙溪類彙卷八

宋 王炎 撰

古律詩

賀吳興郡王生日四絕

丙寅

德聲不減漢間平
玉鑑冰壺表清休
問南山山色翠
淡然無慾自長生

黃門宣賜出丹墀
花萼樓邊禁漏遲
天上龍顏生喜色
鵲鷓飛在萬年枝

長樂觚稜接未央至尊友愛獨賢王宮中共用家人禮
日近清光侍太皇

斑衣盤綬兩光輝和氣融融洽孝慈千載蟠桃今日熟
喜同王母宴瑤池

念往

生別有見日死別無返時綢繆結髮初百歲以為期豈
意中道間弃我忽如遺玉骨空委蛻青山未同歸晤語
永已矣哀懷寧不悲

疇昔鏞溪翁重為子相攸謂我稍可教許以相匹儔此
德未及報黃髮歸山邱今又捨我去垂老增百憂深念
不能置泣然清淚流

半生共飄泊所至無定居晚有一區宅乃以喪來歸樂
少辛苦多嗚呼止於斯臨沒尚了了儆戒皆可書予言
不可忘我意當何如

有姑共饘粥有子自抱乳人亦有困窮子獨最艱苦晚
歲未即安此身先逝矣逝者不可作在者誰與處欲以

理奪情悵然還念起

子大有游東山之約以詩相趣因次其韻

家如錦里先生甫詩似錢塘處士逋若解山中安穩住
定勝軟飽臥流蘇

今昔東山約略同但無紅袖肯相從不妨小試游山屐
因訪騃騃陸士龍

萬杉深處一軒開秀色參天費壑培我為不知林壑趣
黃梁夢覺却歸來

猛省香山及輞川句中摹寫共流傳
煩公檢點遺編看
二老元曾賦幾篇

紙被行

瑤姬不觸麒麟紅金壺潏潏琥珀濃
狐裘公子喜夜永
杯行暖玉煩春葱
簷頭雪花大如掌
洞房但覺春融融
豈知有客方貪睡
漏盡更闌不能寐
花紅玉白不相隨
賴有楮生為伴侶
生家住處近麻姑
亦能幻出水肌膚
絕嫌墨客蠅頭污
懶入官黃藏蠹魚
寧隨人意任舒卷

雖則軟美非脂韋風姨霜女皆退舍稍覺和氣生攏
梅破雪催寒去春回人向花前醉女郎霧縠試輕衫
至此失時因坐廢綠槐影底夏日長人間只要一味涼
青奴元自不嫵媚居然負恃能專房秋風一夜來消息
又却見渠先棄擲冬來復挽楮生歸屬付蒼頭輕拂拭
用則鋪張舍則藏喜愠未嘗形玉色世事乘除無不然
安用動心三嘆息

京丞相挽詩

嗣聖登皇極真儒秉大鈞三官方愷樂萬宇浸熙淳碧
落龍髯去青山馬鬣新衣冠同墮淚桃李失陽春

二

山立羣公表朝廷勢自尊遠謀安廟社厚德鎮乾坤帝
念經綸廣人思色笑溫騎箕今不返麟閣盡空存

三

鬱鬱松坡上潭潭甲第成家方藏寶墨地已獻佳城拱
極三階動扶天一柱傾祇應餘慶遠遺德在蒼生

游東山 并序

予大約予游東山足迹不到凡二十年小徑曲折自
麓至岡或磐石可坐或結茅可憇大抵視舊有加山
中杉木萬根昔所見拱把今日霜皮雨榦亦有老色
昔人有言樹猶如此人何以堪然萬古一軌不必嘆
也暇日婆娑清談暢飲相與開口一笑身外成虧一
切付諸造物足矣予大作而言曰今日之游誠樂明
日便成陳迹此山未有雲溪詩為我落筆可乎予笑

曰從公游本冀一日之閒乃反以詩債窘我然技癢亦自不禁夜歸明日酒醒追述其意而尾之以詩

田舍

結廬稍近樵牧豈亦甘心陸沈自古明時難遇未宜長往山林

松風

松公奮鬣如嘯終日清風颯然佳處元非宮徵誰能寫入朱絃

爛柯

手談一局未了葉落花紅幾回只恐雲迷歸路不容棋
客重來

舒嘯

幽人獨坐空谷最愛夜深月明雲外一聲長嘯四山木
偃風生

待月

只有麴生為侶夜涼同迓水輪未審素娥知否惟予與

影三人

棧徑

詰曲羊腸中斷小安略約通行緩臂不携藜杖翩翩自
喜身輕

入翠

路入半山深處穿雲竟日忘歸若扣山中何有濛濛空
翠沾衣

磐吉

客來捧腹一笑抹月批雲療飢只此如何獲吉為無富
貴危機

披雲

上到蒼螭絕頂四邊無數青山下視樓臺一簇超然身
在雲間

胡清卿來訪留一日亟求去云欲謁鄭宰因以
小詩佐其行

跋涉山川歲一歸奚奴古錦慣相隨自憐機杼無遺巧

却怪珠璣不療飢酌酒挽君澆舌本解驂許我話心期
空囊羞澀將焉往笑說鳧仙舊見知

用元韻答清卿并簡蔡尉

貂裘半敝復來歸正坐剛腸不詭隨見說史君嘗餽贖
似聞內子亦啼飢經年一別方相遇他日重來未有期
試問此行誰借重梅仙青眼是新知

次韻謝胡清卿

殷勤訪我到山中一笑依然尚諱窮氣老絕非年少銳

詩新殊勝舊時工
劇談不惜麈尾落
歸路難淹馬首東
若遇故人相借問
為言衰朽學農功

汪直卿相招以病爽約因成拙句併呈子大

一聲鴉鳩落紅稀
試問春餘幾許時
多謝佳招頻卜日
自慙衰朽却愆期
但能有酒肯留客
莫恨無花空折枝
邑下老禪無恙否
可同談笑一開眉

汪直卿相招子大先至有詩炎後至子大再至

因次其韻

筓輿嘔軋度何許水滿東臯新過雨主人倒屣出門迎
喜氣津津貫眉宇別易會難宜少留清談絕倒殊不休
青衿誦詩勸客飲客亦歡然爭旅酬向來青髻今白首
自古交情難耐久從今乘興時一來請屬細君多釀酒
穀雨後一日子大再有詩次其韻

花氣濃於百和香郊行緩臂聊翱翔壺中春色自不老
小白淺紅蒙短牆平疇翠浪麥秋近老農之意方陽陽
吾儕飽飯幸無事日緝芸簡尋遺芳閒中更覺春晝長

酒酣耳熱如清狂自憐藿食徒過計袖手看人能蹶張
歸於正蓋庶幾變風發乎情止乎禮義云

鱖溪行

并序

開禧丙寅冬到大坂作此情見乎辭若過於傷感而卒
小溪一曲山四合溪邊楊柳藏門闌當時玉人在花下
對花窈窕矜紅顏一雙白璧不可聘許我結佩乘青鸞
我時年少氣方銳自負落筆翻波瀾謂趁春風上霄漢
可以終老同清歡不知辛苦得一第始見崎嶇行路難

有如萍草無根蒂二紀流落江湖間莫年通籍入金馬
虎豹嗔人窺九關天邊失脚身墮地春風破浪扁舟還
雲駟未幾舍我去空委玉骨埋青山重來溪上事皆變
惆悵齊眉難再見王母麻姑安在哉過眼百年皆露電
老身長子恩義深不為向來花映面花枝一謝明年開
玉人一去何時回人今不見花亦盡至此終日空徘徊
百川寧有西流水萬古滔滔同一軌不堪回首細繹思
臨沒之言猶在耳蜀鄉有鳳空求皇秦樹無鳥共將子

年來年去春復冬此生有盡情無窮一泓清淚洒不斷
四山蕭颯來悲風惟有老人老更健年過九十如霜松
尊則吾母舅親又吾婦翁收淚相勞問停車少從容悲
思無益不自禁暫時借酒澆心胸明年強健再省覲尊
前更酌真珠紅

次韻子大四絕

世路羊腸久憚行歸來自喜一身輕故人零落今無幾
獨幸相逢底裏傾

一榻塵埃書滿前，愧無絲竹宴彭宣。而今又斷功名念，
只擬躬耕郭外田。

抽身幸免坐羶針，鏡裏休憐白髮新。杖屨消搖共來往，
更添林下一閒人。

主人速客重尋盟，不但郊居氣象清。家釀滿壺留醉倒，
驪駒未可度歌聲。

送僧惠日歸蟠龍山

宴坐團蒲穩，何緣有此行。理元無作止，事亦要經營。宦

錫尋歸路龍宮出化城更於文字外會取法無生

秋早得雨子大詩言祈禱所致炎謂不可貪天
之功次韻以見區區

宦游錄錄本無奇失脚歸來莫皺眉只合一廛修穡事
豈堪千騎把州麾旱乾偶得崇朝雨秋熟應無卒歲飢
耕鑿熙熙皆帝力豐年請為續周詩

金夫人挽詩

兩大家聲著三從婦德全金珠捐玩飾蘋藻薦恭虔眉

壽無遺恨心空悟秘詮
生芻來奠客千兩擁新阡

萬宣教挽詩

家有青箱學文名早擅場
諸公爭汲引萬里可騰驤
豈料才如此空嗟命不長
雲山埋玉樹松栢倍淒涼

汪貴之挽詩

洗滌膏粱習熟熏班馬香
吹竽多炫鬻韞玉獨深藏
不作山中相應為地下郎
一夔家有子雖沒未云亡

周仁甫挽詩

人物今難得如君孰比肩
干將鋒立斷神駿氣無前
官不過為縣天胡嗇與年
空聞精爽在廟食桂江邊

盧夫人挽詩

在室從名父宜家配大賢
上公調玉鉉中道失雲輶
一品夫人貴千秋列女傳
貂蟬今合窆恰值白雞年

秦事入都出西湖上成四絕

西湖

呼舟特地度西湖欲訪山中幽
子居山色湖光渾似舊

人間萬事有乘除

四聖觀

羽衣引我度松關
借得湖山一眼看
去棹來橈皆物役
箇中惟有白鷗閒

南園

花驄油壁隱輕雷
消却冰山不復來
墳土未乾為餒鬼
園花雖好為誰開

淨慈

鼎新堂殿鬱嵯我中有方袍千指多未審雪山黃面老
樹邊一宿意如何

招諸宰飯六客堂以小詩代折簡

以下湖州所作

雙袖日沾朱墨塵風流那復似前人梅花香裏傾杯酒
畧與鳧仙一探春

通守趙侯改倅會稽以詩餞行

我來席未溫君去袂難摻所喜相知新所恨相見晚吏
能極緝密風度乃蕭散同僚有斯人可近不可遠漕渠

新漲生犂路春風滿置之緹屏中驥足終未展夫豈無
裏言相與共推輓語別一杯酒何時對青眼願保千金
軀努力加飡飯

勸農道場山

練日遵詔條行春勸耕事擁旆有傳呼據鞍小馳騫兒
童競聚觀父老歡來詣松徑度坡陀蓮宮得清閤此行
非遨遊所職在撫字示之淺易語諭以丁寧意扶杖既
言歸解衣聊少憇山中無俗情物外有幽趣僧間衆所

羨農困吾甚愧不敢飽登臨肩輿下山去

招魏倅項教授小飲

莒葉青青初出水布穀聲中耕事起去年蝗旱傷農收
今年日望歲豐美聞道郊原麥浪平但慮飛蝗遺孽耳
甚欲往來阡陌間稍與田家共憂喜老大心情畏忌多
攬轡未行還自止假日公庭吏牘稀祇可清談共揮麈
小園春色亦自都醉日杏桃嬌欲語舉杯相屬謝東風
莫待枝頭落紅雨

用前韻酬魏倅

手把一麾求霽水身似痿人方暫起此行本為貧所驅
非戀吳中風土美浩蕩煙波隔白鷗間關道路勞黃耳
幸而別駕有詩流相逢眉睫津津喜我今白首君黑頭
莫訝鐘鳴不知止每因揖客愁下榻豈暇談玄頻捉麈
忙裏偷閒花下飲更約廣文同笑語把酒消憂憂更來
見說東臯今渴雨

夜半聞雨再用前韻

輓轡百尺汲無水映日四山雲不起朱轡浪說勸農桑
衣食何從可甘美禱而得雨不苦旱竊疑此殆偶然爾
夜半潺潺簷溜鳴孤枕夢回心失喜兒童挽犢婦餉饑
襖襖耕夫亦勤止鼠跡印我榻上書蛛絲罨我壁間塵
抖擻胸中三斗塵強欲吟哦無好語請公酌酒更揮毫
快寫珠璣歌喜雨

魏倅同杜仲高游黃龍洞次韻

風流別駕臨苔溪行厨携客尋幽竒五湖浩蕩三江永

綠淨不知凡幾頃憑高縱望心目開便可一傾三百杯
疑與塵寰不同宇彈壓風光須妙語只恐揮毫驚蟄龍
金相玉質音玲瓏

郡中游觀之地清風樓為第一前此諸公有詩
似覺摹寫未盡輒成唐律一篇約魏倅同賦不
拘和韻可也

山屏四面碧相重苔雲無聲瀉玉虹萬戶連甍皆在下
一樓飛棟獨當中不容半點浮塵到但覺無邊爽氣通

安得儵然辭物役披襟終日挹清風

和項廣文喜雨

雨師雲將莫論功天意元因聖德通不但水生苗厭厭
也應土潤黍芄芄田間老稚交相語秋後倉箱定不空
絳帳先生妙言語請歌嘉定比元豐

與魏倅葛書記同謝雨于黃龍洞回憇小玲瓏
晚飯魏倅有詩次其韻

政術平生欠講明賴公關決可蒙成食新雖有豐登望

闔郡寧無嘆息聲因為賽神携一榼暫能擇勝駐雙旌
歸來依舊塵勞在不盡逍遙物外情

苦脾泄在告因飲白酒一杯小愈魏倅有詩已
而病復作因次韻見意

羸老畏風濕河魚將奈何玉友豈不佳終難護天和數
息謾吐納鍊形空按摩自笑來日短殘漏鳴銅荷吏事
如衣垢濯之費接掌養痾諒非宜山林歸興多

賀皇太子生辰

鳳姿日表極高明講習詩書若性成參決萬機禪獨斷
力行三善荅輿情綺園何必來為助啓誦安能更擅名
日侍兩宮慈孝洽萬年主鬯共安榮

鬱葱佳氣擁天庭申命無疆啓震亨少海永重瀛海潤
前星長拱極星明螭旗色轉秋風爽雞戟光凝曉月清
遙想宮僚斟玉斝進趨無地倍馳情

題歸鴈亭

江湖水泮草生時鴻鴈南來又北歸莫謾說歸歸不早

青雲高處有危機

題白蘋亭

得句柳刺史築亭顏魯公二賢雖異代千古有遺風
苔水永不盡蘋洲今半空老懷多感慨訪古意無窮

題碧澗亭

一色接藍染碧流翬飛恰對白蘋洲風清六月非朱夏
氣爽三時似素秋自笑品題無翰墨也知領畧欠觥籌
鳧鷗定怪霜髯叟難洗胸中萬古愁

六客堂

一樽相屬更何人
六客當年事已陳
扁榜特書名尚在
篇章深刻字猶新
關心吏事方窮日
企踵前賢分絕塵
涉筆符移憂百謫
偷閒來此一嘖呻

生日魏倅惠三詩

四海眼獨高
江湖走蹒跚
帝念風霜飽
命之官仙班
刺天紛羣飛
政爾袞袞難
鹿挾朱輪去
勇哉支狂瀾

二

作州豈無人孰別涇與渭仰止雲溪老靜處酌古味庭
戶令無譁畫閒棠蔽芾吳儂了不知但說物吐氣

三

門左何煙霧挾將小春還千鍾酒拍浮一笑衣爛斑醉
上樓百尺可仰不可攀定應切星辰天風吹酡顏

酬俞子清侍郎惠畫韻

筆端元有畫中詩寫出三浴一段竒追憶舊游如昨日
艤舟細看中興碑

一去星沙二十年夢魂時到橘洲邊
從今不起南徂念移得湘山在目前

送蓬庵梵老

緩行聊復倩人扶烟烟精神兩碧驢
落筆語言清透骨恐公胸次有冰壺

為我衝寒特地來扁舟興盡又須回
相思若要問消息早寄一枝牆角梅

梵老以小詩為壽和韻答之

不問鸞驂鶴駕仙且游無色界中天更煩辨取詩千首
一歲從公索一聯

呈游大冶

昔在桃溪少壯時而今衰颯髮成絲悲歡三十年中事
付與寒窻酒一鴟

送游大冶歸建陽

震澤黃柑熟茗溪紫蟹肥天寒留客舍歲晚念親闈抱
負須時用行藏與志違臨分話情素衰謝亦謀歸

魏倅和鈺老一詩因次其韻

俯為生靈與敵和君王何忍憤揮戈
信行塞外還交聘人在軍中可雅歌
金帛莫嫌今重費丁黃將見歲加多
漢淮千里惟青草乘此屯田可就磨

趙處州挽詩

秀邨多英俊惟公最有聲君陳兼孝友
子政極忠精白璧千金價青雲萬里程
皇天無老眼名位止專城

二

白首來苔雪深知有故人登門雖不數傾蓋本相親浮
鷁行方遠烹魚墨尚新青山埋玉樹老淚漫沾巾

題墨妙亭

晉唐行草可同科樂石雕鎬便不磨幾載雨淋兼日炙
一朝雲集又星羅要知訪古搜求盡應為凝香暇逸多
潇洒高懷堪健羨簿書堆案意如何

送魏倅

俗士不聞道利欲熏其心陽浮外酬酢中有機窈深宛

陵有君子殊不同今人矯矯鶴鷺姿入俗不受塵挹之
淡於水即之暖如春筆端奏金石妙處無新陳念我久
頓挫晚歲乘朱輪烹鮮易以擾御黠難使馴賴有賢貳
車一心同撫循遂於吏事外拂拭綠綺琴為我肯屬耳
領會山水音持此定交契愈久情愈親東風二月初梅
花照溪津語別一杯酒莫辭十分斟聚散亦常事豈必
含酸辛重念髮種種不禁憂患侵君今入觀闕我亦返
山林行藏異塗轍何日再盍簪所蘊勿卷懷朝廷須世

臣

二月望日留越上偶成

此以下紹興所作

擺脫軒裳累此身
今自由餘生能有幾
外物已無求
嫠水自堪隱稽山
姑少留千岩并萬壑
春暖一遨遊

謁告成廟

玉帛何年會衣冠
此地藏物存惟寔
石神變失梅梁並
海山川盡踰河道路長
六臣陪廟食千古共烝嘗

游稽山

失脚來苔雪春風一棹還尋幽探禹穴問訊到稽山意
在煙霞外身居井邑間桃花應冷笑頭白不能閒

題大禹廟

夏后南巡地登臨一慨然卑宮今造寺非飲孰名泉古
道知難復人情信誤傳不隨時俗改惟有舊山川

鑑湖

粼粼萬頃碧玻璃今日耕鋤半稻畦菡萏開時還自好
買舟一醉玉東西

二月中休日黃帥領客登望海亭有詩因次其
韻

翬飛棟宇壓危峯面面風光入座中
潮汐近通天闕下蓬瀛疑在海門東
巡行誰說秦皇事疏鑿今餘夏后功
空濶無邊惟此地君侯心與境相同

追悼昭叔弟

昭叔弟不祿數年夫婦皆未葬危坐悲念時自吳興
罷官來越上候歸當為卜地此詩所以誌也

老去無他念追懷手足親學成雖漫仕客處只長貧在
昔為三友如今少一人青山未歸窵回首獨傷神

贈岩雷道人

胸次有藻鑑聲行朝野間我來勾踐國君住少微山青
眼肯相顧白頭今得閒窮通無可問歸去掩雲關

賀監宅

輕解金龜呼酒徒却問君王求鑑湖歸來踟躕著鶴髦
自辦米帛供妻孥鸞驂一去杳無跡數畝荒園生草棘

惟有青青秦望山曾識湖邊老狂客

游景德

老怯鶯花笑春殘一出游城隅尋古寺柳下繫扁舟身
健聊乘興心閒不著愁支郎能款語清坐小遲留

即事

故里只十舍滯留猶未歸湖山無此好父子且相依白
壁難磨玷黃間暗發機平生丘壑在一笑釋前非

麝香萱草

穠綠叢中出嫩黃折來時吐麝臍香朝開夕謝休惆悵
我已無憂不待忘

寄潘維節

黑貂裘做君窮甚黃犬書來我慨然肯到越中同住否
秋深即上歛溪船

兩鶴

仙家墮下兩騏驎寄食庭除未易馴正為白頭違世路
要須丹頂伴閒身高飛橫絕心雖在短舞婆娑意亦真

同返故山依蕙帳莫思三島十洲春

食楞梅

是處揚家果求如此種難色深渾是紫味美更無酸磊
磊堆盤潤津津逸齒寒品高何以辨但把一楞看

會稽六月初五日新米入市價減舊以升計之
凡十二三聞海商米船方集亦損其直

大侵難宿飽小熟有晨炊歲事早如此人情喜可知田
家甘糶賤海賈恨來遲粒粒皆珠玉無忘餓殍時

七月二十二日遣懷

寥落求鳳凰，淒涼舐犢牛。有時追往事，無處著清愁。世故今猶古，年華春復秋。西風乘一舸，歸去理菟裘。

二十五日聞德瑩弟訃音越三日悲不能禁以

小詩自解

我以官為累，君因病得衰。豈知成永訣，不及待歸期。遣
至書來疾，賫回藥去遲。餘生來日短，終不免深悲。

病中書懷

秦望山光翠欲流
荷花落盡鑑湖秋
不堪衰病歸心切
難為湖山更少留

雙溪類稿卷八

欽定四庫全書

雙溪類彙卷九

宋 王炎 撰

古律詩

舊苦左臂痛今春自雲川罷官寓居會稽秋中
聞德瑩弟訃音幽憂無聊背脅得疾痛楚殆不
可忍早夜思家恕子慨然投劾同歸壯年游宦
計日月為攷舍之而去可謂愛親矣予年過七
十兄弟凋落人生非金石誰能長存有子而孝

使予返故園父子相依鐘鳴漏盡終於牖下可
以含笑入地成唐律一篇以著其意

蕭蕭華髮更何為元是窮鄉一布衣同產弟兄誰見在
餘生父子獨相依我緣多病念家切汝為愛親投劾歸
出處不齊難逆定時來還自刺天飛

西興阻風

小市西興渡年來一再行花開方淑景木落又寒聲雲
破日還晦潮回江未平壯年曾試險遲莫敢輕生

江亭曉望

天在空濛外山橫杳靄中
潮翻江水白日射海霞紅
旅食思鄉社歸舟待便風
老懷誰共語注目送飛鴻

夜宿閔灘下

歛江兩岸山立壁一水潭潭浮紺碧
嵌空老石出中流觸碎玻瓈成沸白
灘高水落定難行莫雨淋浪新漲生
三更風怒山欲吼催喚金烏回曉晴
篙工倚拖笑相語但上閔灘無所阻
明日日晡過歛渚艤船沽酒勞辛苦

將使送玉堂春花江南竹笋次韻二絕

自紹興
回

小白長紅盡絕塵不將朱粉污天真應憐三畝荒涼地
乞與鰲扉一種春

此君長得擗龍兒不為供人口腹資養就翠梢如結實
來儀當有鳳師師

題詹氏佚老堂

矍鑠精神鬢未斑
翛然青坐對雲山
兒孫滿眼生涯足
贏得壺中日月閒

凶年慨然嘆久生成贅因以長句述此意

頻歲田家苦旱蝗劇思小稔活丁黃稻稔久渴三秋雨
菽麥俄經一夜霜未保溝中無殍死已聞道上有流亡
白頭屏處山林下只怕羣偷慣奪攘

落花

小園數樹雜花開零落無聲覆綠苔休恨五更風雨急
明年春色自歸來

春日苦雨



桃花開時苦多雨花似啼粧悄無語桃花謝時雨更多
奈此輕紅委地何明年花似今年好明年人勝今年老
是誰留得長少年對此不須空懊惱雙飛燕子營新巢
舍後舍前穠綠交長鬚但為釀麴米春色尚餘紅藥梢

密室 壬申冬

密室可附火小窻聊借明風寒皆不到溫飽更何營省
事事自少養心心亦清床頭猶有易座右不須銘

久雨而雪

兩港水爭長四山雲未歸忽聞雷虺虺
翻見雪霏霏蠟屐老難出竹爐誰共圍
金烏無恙否何事隱明暉

清明日先塋掛楮錢

癸酉

昔人最重去墳墓絕喜歸來老一邱
豈是他山無笋蕨只緣故國有松楸
百年暫住人間世千古俱為地下游
色境悲歡雖夢事楮錢聊掛樹梢頭

將使有詩許移厨雙溪次其韻

艤舟柳岸載清尊招我花邊一賞春
莫笑看花人已老

白頭曾是少年人

石上窪尊可置杯
石邊更可著浯臺
旁人不識溪山趣
將謂尋春特地來

莫春天氣漸清和
枝上紅稀地上多
惟有松筠四時好
風枝雨葉綠婆娑

新晴

度臘殊多雨
開年亦未晴
地卑常礎潤
月墮忽霜明
茅舍煙猶濕
秧疇水可耕
幽花并細草
隨意也欣榮

和董叔重韻

秀色驚老眼見此千丈松
門如翟廷尉人愧王君公
驪珠損佳惠衰遲豈宜蒙
三復不能已一室生清風

題黃元靜廣先樓

聞道樓居好翬飛百尺餘
箕裘能襲舊丹腹遂如初
生理萬鍾粟義方千卷書
家聲將益大車馬炫門閭

社日

日暖泥融燕子飛
海棠深淺注鰾脂
一杯社日治顰酒

報答春光爛漫時

喜晴

雨過千畦穉極黃
趁晴刈獲可登場
田家子婦開眉語
白粲新炊滿屋香

雨過兒童飽飯牛
趁晴耕墾種來牟
田家作苦無儲蓄
待哺全須麥有秋

舟行到滿塘

壬申

蘋花雙港靜蓮葉一舟輕
白石波間走青山路外行
條

魚方自樂鷗鳥不須驚擁鼻蓬窗底儵然午吹生

秋夜

索索風葉響寒生秋夜深閒思千古事虛費一生心命
薄謀多拙年衰病易侵黃梁今夢覺高枕卧山林

壬申十二月二十八夜雷

殘臈方淫雨中宵忽怒雷更長頻展轉夢斷但驚猜凍
雪何時解春風幾日來龍蛇今在蟄堦户不宜開

初春苦寒久不到雙溪成長句書懷

老去頗多病苦寒摧折之袍襦非不温不能護清羸蒲
團穩附火蓄縮如凍龜西山有桃李借問惟枯枝好花
何時開仲春以為期榮悴自相代出處亦有宜天寒但
深藏日暖當游嬉強健不須喜老死何必悲曉日升扶
桑莫還入崦嵫置之勿復道理達心何疑及時且行樂

花邊傾一卮

和將使早雪

甲戌

曉日藏明恐雪羞遠山含暝更雲浮不須苦道豐年瑞

擁衲爐邊索酒舟

又和早雪韻

夢覺流蘇寒粟冽曉起方知天釀雪松公變色失蒼髯
竹士垂頭摧直節倚樓四望無紅塵疑是身居銀漢津
千林一色皆玉樹不許梅花先得春

梅花

園林都未覺春風蓓蕾枝頭茁小紅要識十分清絕處
暗香疎影月明中

欲向花邊把一杯喜逢臘盡又春回直饒百歲為期限
能見梅花幾度開

咏便坐梅花

時病起

去年花下立踟躕搔白首今日花邊坐病起更衰朽老
與病交侵歡悰尚何有人老不再少花謝還復開對花
堪酌酒畏病不舉杯寂寞重寂寞春風何事來

病起

羸軀方伏枕凍骨倍加綿自覺脾為約醫言脉太玄不

禁腰痛楚仍苦膝拘攣搔抑方能定扶持僅可前緼袍
藏被底熾炭倚爐邊衰謝誠宜爾風寒實使然迺遭雖
有數調護不無愆初日憂難療兼旬幸稍痊是身無實
相何術保餘年不死方成佛長生乃是仙闔棺寧再起
拔宅謾虛傳力豈能加命人終不勝天災生雖或免算
盡必難延只合情無滯毋為疾所纏窮通皆任運逆順
但隨緣南畝無千斛西山有數椽飢當量腹食困則曲
肱眠此樂人知少浮休永息肩

雙溪種花

雙溪漸有雜花開
每日扶筇到一回
勝似名園空鎖閉
主人至老不歸來

蒼頭為我斲西山
扶病移花強自寬
縱不為花長作主
何妨留與後人看

春日有感

拍岸晴波蘸柳絲
一雙鷓鴣浴紅衣
可憐陌上花開盡
不見魚軒緩緩歸

題汪尉立之快閣

市廛屬耳太喧囂
林藪藏身又寂寥
負郭面溪開小閣
箇中登覽獨逍遙

傍簷古木綠陰陰
下有清溪可洗心
燕坐紅塵飛不到
何須風過一披襟

將使有詩欲移具相邀到雙溪因次韻

緬思花下飲歲月易侵尋
人老今華髮春深半綠陰
揮毫來妙語移具有佳音
草木生光彩青藜肯下臨

和何元清韻九絕

春深遠屋綠陰稠
却掃無人識
冗侯獨肯敏
關相勞問
不妨挾冊共藏脩

絲竹無緣在後堂
肉羞不辨出東房
金徽彈罷惟清坐
共挹熏爐一棧香

屋邊花萼自離披
屋底臞儒但著書
游冶郎君應冷笑
不能暇逸獨何歟

老來視聽稍精明
休問如何太瘦生
還信閒中安樂否

龜巢蓮葉喜身輕

覓官安用羨登仙
求富何須願執鞭
洙泗從游多達者
簞瓢顏子獨稱賢

青眼雖慚阮嗣宗
為君解榻席相重
菜羹蔬食能甘否
自昔人言儉易容

莫年築室北山邊
自笑渾無塞屋錢
巾褐翛然窮亦樂
豈曾有夢到金蓮

一洗平生箏笛耳
極知綠綺有遺音
君臣慶會休三弄

泉石膏肓不可鍼

焦桐為我發哀彈但覺清風透指寒老大雖思聞古調
莫彈別鵲感離鸞

雙溪即事

乙亥

竹底開幽徑山根結小樓誰知多病苦自判一生休舟
著平沙尾橋橫古渡頭往來皆物役却掃獨無求

清老畫雙溪壁以詩謝之

乙亥

老夫哦詩聳兩肩落筆不停稱腹橐緣詩寫出無聲句

畫史追之誰得到為予壁上留真跡水墨纖濃任揮掃
石根竹樹極蕭森中著羽蟲疑叫噪雖然畫意不畫形
形意兩全方筆老熟視時時自首肯從旁見者皆稱好
師言此亦吾餘事佛祖玄關須探討未宜直說色是空
不著色空斯見道

用元韻答清老

巧匠胸中有全室能文紙上無脫橐老禪善畫亦如是
毛錐未出意先到解衣盤薄小經營驀然揮洒筆如掃

我思詩畫本一律衆作徒多等蟬噪畫手無如王右丞
一似詩中杜陵老正緣此老襟韻高工拙竒常無不好
斲輪妙處不可傳此事難從筆端討由來萬法生一心
貫徹精粗無二道

再答清老

篆車創始自椎輪莞簟從初但蒲橐詩到晚唐非不佳
少似國風能理到嗟予老矣弃穎泓卧病終年長却掃
客無脫屣一榻懸人不到門羣雀噪敢意支郎念岑寂

時將妙語起衰老若人搜句乃餘事雖不雕鐫自精好
況於佛祖可呵罵豈無魔外宜攻討早辨山居一把茅
為我長歌歌證道

平生言語苦不工甲乙未能成類橐囊時陶謝以詩鳴
竭力追隨終莫到上人詞鋒極痛快睥睨千人軍可掃
長須驚喜見此客無怪繞枝鴉鵲噪師言能詩且工畫
筆仗須先知嫩老復言能畫亦飽參疊疊玄談聽更好
吾聞法海深又深性珠可得不可討若除詩畫與談禪

未審云何真悟道

舟行到葦菰和清老韻

沙尾維舟傍水楊主人延我坐中堂
山焦石裂方亭午借得微風一霎涼

詩中巧手妙穿楊便可階陞屈宋堂
句挾冰霜堪却暑令人心地亦清涼

和清老韻

不作麒麟植方知外物輕
杜門使野處躡屐飽山行未

說窮通樂宜無寵辱驚顏齡寧有幾聊爾憇勞生

再和元韻

蟬蛻塵埃外翛然世累輕開堂聊演說杖錫遂飛行畫
妙人難及詩豪我亦驚筆端遊戲爾法忍貴無生

雙溪即事

築室依林麓開門向水涯經過無俗駕附近少人家洄
湫潭成沫嵌空石有窪幽居誰是伴鳧雁聚平沙

舟行過白石見將使夜宿毛家林翌日到莘菽

却回和清老

蒼頭倦晨炊，卯飯幾及午。沂流赤日中，舟子亦良苦。魚躍戀芳餌，鷗飛避鳴櫓。仙翁所退藏，好境自呈露。溪水清可鑑，山雲橫不度。坐斷泉石幽，不受塵土污。問之何所得，妙處難悉數。初非練玉泉，亦不鳴天鼓。人癯道方肥，心遠貌亦古。老衲同我來，得句時一吐。物色盡詩材，筆底隨指呼。行行更前之，繫纜日未暮。轉拖涉奔湍，支筇入幽塢。倦甚宿茅茨，睡熟不能寤。遲明又葺食，凌風

上前浦重露雨點疎晴嵐雲氣布蝗蝻尚飛揚禾稼難
愛護村落有狗偷耄倪且狼顧念此一悄然回舟雙港
渡空羨皎然師詩成有神助

哭吳耀遠

孤陋無如我交親賴有君方圖來往數豈意死生分自
卜牛眠地今歸馬鬣墳不能澆斗酒忍遽述銘文

俞義夫挽詩

恩愛周姻族寬和善里閭年高無悔吝身沒有名譽願

見今何及從游舊亦踈若修耆舊傳言行可追書

拒霜花

池上木芙蓉曉寒摧折之綠葉未盡彫紅芳已先萎空
得拒霜名憔悴不自持人生亦如此榮盛須及時少壯
不久留老疾仍相隨騰騰當任運惓惓徒自悲萬古同
有盡華顛無再緇及今幸強健不樂將何為

冬至日雪

乙亥十一月二十三日

日脚初添一線長飛花撩亂壓微陽朱門滿酌羊羔酒

誰念茅茨有絕糧

次日快晴

曠曠曉日射窻明
急雪漫空快得晴
田父飯牛應喜甚
東臯澤澤可深耕

早梅

似無還有暗香來
知是春風到早梅
一歲一番花似玉
老人見得幾番開

脚婆

竹奴夏日涼脚婆冬夜煨二物不同時皆堪伴幽獨自
吾失伉儷一紀誰與宿年高氣血衰日短天地肅魚眼
夜不瞑雞膚凍生粟伏枕屢展轉挾纊但拳曲脚婆當
此時貴重如金玉爨釜蟹眼生汲之滿皤腹暖氣所燠
蒸羸軀任伸縮粉黛工取憐自可薦衾褥豈不辟沍寒
而能動情慾不如此瓠壺但可暖吾足貌醜不媿媚坐
穩無顛覆妄想何從生黎明睡猶熟

李忠甫見惠長牋以詩謝之

寂寂羅雀門日見交游疎短李不我弃一年憇琴書青
衿孺子革共喜得範模黃鵠有遠志樊籠不可拘今將
舍我去雅意何勤渠駢儷出妙語簡潔無費辭捲置懷
袖間報之欠瓊琚惟期在明秋刷羽摩天衢

病中即事三首

附火膚革燥遠火寒慘慘坐卧置湯婆稍覺兩足暖抓
搔不停手苛痒殊未減飲食固多忌所幸能強飯客至
不出迎予非敢踈懶

二

塊坐小窻下簷牙烏鵲語飛飛去復來
遶樹鳴不已料汝必不誤顧我亦何喜
恐有行人來未知誰氏子

三

旬浹不見日凍雲塞天宇兒童相與言
雪意恐未已一月見三白為瑞亦足矣
老夫固畏寒貧者憂凍死六出亂飛花
不如晴可喜

子用惠魚四軸以詩謝之

四幅溪藤任卷舒
管城幻出化龍魚
風雷定似梭飛走
莫誤呼兒覓素書

掉尾揚鬐氣象閒
或潛或躍出毫端
非魚知得魚如許
豈在濠梁子細觀

石倅宗卿挽詩

并序

嘉泰中婺女石宗卿來宰婺源時炎自中都罷歸得
楚東之命之官不數月又以罪罷杜門却掃郊外罕
至縣庭而宗卿睽睽衰朽恩義甚篤炎竊觀前後來

為宰者或高明不可欺以事或剛介不可干以私求其潔白清真樂易外不事邊幅內不立城府粹然有儒者氣象惟宗卿一人而已他不及也炎是以親之敬之宗卿自婺源解印得倅宜春嘗一交信自後音問斷絕嘉定八年冬宗卿之子武自郡城以書及墓誌銘來則宗卿捐館祥禫矣炎與宗卿交淺而情深宗卿沒於泉南病不及問喪不及弔比其葬又不及執紼死生永決莫年失此良友豈止一哀出涕武以

挽詩見屬炎不待屬也故詳序其交友之情而申之
以詩以寓其哀云

潔白心如玉寬和氣似春索居當晚歲取友得斯人
女書難再泉南迹已陳天高不可問反袂獨傷神

二

能吏今非少純儒古亦稀斯人胡不壽吾道豈其非才
自堪時用心難與義違九原無起日誰復可同歸

病中書懷

丙子

霍骨雞膚不耐寒那堪癬疥更斑斕開年慘淡陰兼雨
終日抓搔寢不安未可給扶親儿杖豈能見客攝衣冠
人言剝復相更代頻把韋編反對觀

追念將使叔

青山橫白雲野色極瀟灑見者必屬目寶相在其下此
翁强健時門外無車馬夫豈固絕交欲與無可者獨我
時扣關辭色頗相假玄禪到佛祖妙句近風雅萬事已
陳迹哀思淚盈把即之不復見去之不忍捨優婆塞何

為酌水日莫掌三徑草易荒悲風遶松攢

和汪誠之韻

昏昏未必晦昭昭未必明
渾渾未必濁濇濇未必清
吾道本自貴國爵亦可并
所以魯素王但欲比老彭
嗟予久斂退用志難崢嶸
吾友暫蟠螫側耳春雷轟
韞積足豈別扛鼎肩不頽
鼓行當擅場敵者誰為勅
佇看慶多馬為彼酌兕觥
下視俗子陋未識仁者榮
譬如黃流污寧澹皎月晶
相期在遠到所急非小成
頗恨會遇疎未

免鄙吝生大篇何春容雅思真和平知君培其根許我
擷其菁虛靜能養心篤實可存誠此理君得之底裏期
再傾

丙子重陽日有感

南山木葉赤北山木葉黃秋色日夜變白露將為霜玄
鳥去已久候雁方南翔携壺登高侶滿手萸菊香佳節
不可負而我病在床人老自多病何為苦悲傷去年重
陽日貴孫在我旁知我愛敬客拱立傳壺觴十五未冠

巾總角頽而長望其有成立門戶生輝光前樓千卷書
可以識義方南畝千斛穀可以充積倉一旦捨我去冰
炭交中腸萬物皆有盡死生理之常修短百年間何必
論彭殤豈不自開釋念之終難忘長歌意無盡歌罷還
淒涼悲風扣林木為我號清商

九月二十九日到思溪莊避人事十月初四日
過生朝方歸初三日早起于遣人來送酒食并
詞二闕因成唐律二首

僻遠無來客，
尪羸厭久生。
擁爐便獨坐，
扶杖懶徐行。
中歲失怙恃，
晚年無弟兄。
絕知來日短，
萬事可忘情。

二

人事有酬酢，
山居方寂寥。
三時纏宿疾，
十月見生朝。
瘦骨添綿護，
枯腸怯酒澆。
為予歌一曲，
亦足慰無聊。

與滕元英

自武口至湯郊，
不過十里。
元英一年不相見，
丁丑正月來訪，
留一日，
問其再來以秋為期，
因成唐律一首。

云

君尚精神健吾真氣血衰肯來同晤語別去即懷思不
厭經過數惟憂後會遲春暄宜緩步何必以秋期

贈平首座

家在青山下投閒歲月多杜門長却掃杖錫獨經過學
佛非無法哦詩恐是魔願言行古路其遣覆藤蘿

再贈平首座

平大用輟參靈隱歸南澗謀起淨坊於煨燼中持鉢

回自楚東見予於千秋山下求以數語贊其事八十
老人投棄筆硯已久況子謀已定願施者衆其成有
日何以贊為堅辭不獲乃成拙句從吏之雖然伽藍
興壞乃是色境於色境中營繕亦是幻事向上更有
一閻乃到實地未句及此未審以為何如他日當增
一重公案也

南澗誰人掃劫灰行纏恰自冷泉回式公昔日曾留誓
大用今生乃再來應是伽藍當更造豈闕回祿故為災

上頭更有華嚴界彈指重重殿閣開

杜工部有同谷七歌其辭高古難及而音節悲壯可擬也用其體作七歌觀者不取其辭取其意可也

有客有客字晦叔東臯歲收可饘粥何為得飽尚多憂
豈是老窮無止足十日之中九日病以杖扶行懼顛覆
嗚呼一歌兮歌意長風林助我鳴悲商

有母有母年七十一室枵然徒壁立茹蔬啜粥不怨尤

卧病在床無藥物我為舉子得一官南陔之養嗟何及
嗚呼二歌兮歌轉悲羞見慈烏隨母飛

有弟有弟手足親與我鼎立成三人叔氏鰥居苦多病
季子宦遊依舊貧吾兄既終弟亦逝歲晚惻惻惟一身
嗚呼三歌兮歌意放歌罷無言坐惆悵

有妹有妹家苦貧補紉組織多辛勤二男三女未婚嫁
已見宿草生孤墳問疾弔喪俱不及念此不置長酸辛
嗚呼四歌兮歌更苦往事關心誰可語

有子有子共七人六子短命一子存後固無窮前萬古
浮生脩短何足論天屬情鍾在我輩歲月雖久哀如新
嗚呼五歌兮三嘆息理不勝情難自釋

有孫有孫未冠巾頰頰狀貌如成人謂其長大習詩禮
他年可望高吾門豈期一旦舍我去白首老翁徒痛心
嗚呼六歌兮音調急獨坐吞聲襟袖濕

有婦有婦孀吾孫僅能朞月問晨昏吉凶自古不可定
所以賀吊更在門人言貧家女難嫁豈料既嫁俄不存

嗚呼七歌分意不盡頻年多難天難問

七夕一絕句

輕雲捲箔月鉤垂正是青樓乞巧時
牛女相望隔河漢浪傳天上有佳期

贈劉術士

聞子能知筭逢予屢索詩諸公多妙語
老我更何辭久客丹心苦脩途蠶足疲
秋深風露冷歸去莫遲疑

與趙道人

欲上青雲却垂翅歸來掃軌空山裏道人說相來敏關
酒半醺酣談疊疊我今布褐終餘年豈論燕頤弁爲肩
謂予形是朱頂雀兩眼藏神高頰顴彭殤壽夭誰無死
不將動目搖湛水道人去後若復來定應難相壺邱子

嘉定丁丑十二月謀葬貴孫老病不能與事但
此心傷痛因成小詩以寫其哀

念汝方青髻嗟予久白鬚在亡終不免壽夭太相殊有
恨心如割無言淚隕珠何堪植馬鬣玉樹悶黃壚

與三山相士林子和三絕

年登八十更何為
手足支離視聽衰
自笑已如雞失旦
不須苦說雀知時

鳶肩燕頤刺天飛
自顧而今已後時
中褐蕭然成野老
有何情緒更哦詩

魚蝦瑣細不堪求
水澁溪寒欲斷流
若畝侯門逢短李
釣鰲便可月為鉤

雙溪類稿卷九